

Psalmus 101

- 1 Domine, exaudi orationem meam:
et clamor meus ad te veniat.
- 2 Non avertas faciem tuam a me:
in quacumque die tribulor, inclina ad me aurem tuam.
- 3 In quacumque die invocavero te,
velociter exaudi me.
- 4 Quia defecerunt sicut fumus dies mei:
et ossa mea sicut cremium aruerunt.
- 5 Percussus sum ut foenum, et aruit cor meum:
quia oblitus sum comedere panem meum.
- 6 A voce gemitus mei:
adhaesit os meum carni meae.
- 7 Similis factus sum pellicano solitudinis:
factus sum sicut nycticorax in domicilio.
- 8 Vigilavi,
et factus sum sicut passer solitarius in tecto.
- 9 Tota die exprobrabant mihi inimici mei:
et qui laudabant me adversum me jurabant :
- 10 Quia cinerem tamquam panem manducabam,
et potum meum cum fletu miscebam,
- 11 A facie irae et indignationis tuae:
quia elevans allisisti me.
- 12 Dies mei sicut umbra declinaverunt:
et ego sicut foenum arui.
- 13 Tu autem, Domine, in aeternum permanes:
et memoriale tuum in generationem et generationem.
- 14 Tu exurgens misereberis Sion:
quia tempus miserendi ejus, quia venit tempus.
- 15 Quoniam placuerunt servis tuis lapides ejus:
et terrae ejus miserebuntur.

- 16 Et timebunt gentes nomen tuum, Domine,
et omnes reges terrae gloriam tuam.
- 17 Quia aedificavit Dominus Sion:
et videbitur in gloria sua.
- 18 Respexit in orationem humilium:
et non sprexit precem eorum.
- 19 Scribantur haec in generatione altera:
et populus qui creabitur laudabit Dominum.
- 20 Quia prospexit de excelso sancto suo:
Dominus de caelo in terram aspexit.
- 21 Ut audiret gemitus compeditorum:
ut solveret filios interemptorum:
- 22 Ut annuntiet in Sion nomen Domini:
et laudem ejus in Jerusalem.
- 23 In conveniendo populos in unum,
et reges, ut serviant Domino.
- 24 Respondit ei in via virtutis suae:
Paucitatem dierum meorum nuntia mihi.
- 25 Ne revoces me in dimidio dierum meorum:
in generationem et generationem anni tui.
- 26 Initio tu, Domine, terram fundasti:
et opera manuum tuarum sunt caeli.
- 27 Ipsi peribunt, tu autem permanes:
et omnes sicut vestimentum veterascent.
- 28 Et sicut opertorium mutabis eos, et mutabuntur;
tu autem idem ipse es, et anni tui non deficient.
- 29 Filii servorum tuorum habitabunt:
et semen eorum in saeculum dirigetur.